

春秋說畧

春秋說畧卷十

棲霞和懿行學

海陽趙銘彝校刊

昭公

元年春王正月公卽位

繼故而卽位忍也

叔孫豹會晉趙武楚公子圍齊國弱宋向戌衛齊惡陳公子招
蔡公孫歸生鄭罕虎許人曹人于虢

傳曰尋宋盟也讀舊書加牲上衛先陳蔡蓋先至故也一招
也此稱公子後稱弟何也稱公子者常辭稱弟者非常辭
年

三月取鄆

取邑不繫國何也方氏苞曰鄆爲莒邑已見前矣○牟廷相

曰鄆非莒邑也亦非我邑也莒魯爭鄆久矣不偏繫存實也
夏秦伯之弟鍼出奔晉

傳曰懼選也車千乘如二君稱弟者非大夫

六月丁巳邾子華卒

晉荀吳帥師敗狄于大鹵

傳曰崇卒也崇卒者毀車用卒

秋莒去疾自齊入于莒莒展與出奔吳

去疾何以莒不言莒則不知爲何人也展與何以莒不言莒
則不知爲何人也不稱爵不能君也或曰從告辭也不稱子
蓋庶孽也或曰亦從告辭也凡歸入或繫國或不繫國便文
耳非義例也鄭突齊糾曹亦不繫國者蒙上文也突蒙執鄭
祭仲之文糾蒙伐齊之文赤蒙侵曹之文雖不繫國從可知

也鄭忽齊小白曹驪必繫國者文無所蒙也鄭忽曹驪文有所蒙矣若小白不繫國則納糾小白連文爲不辭若小白獨繫國鄭忽曹驪皆不繫國則又嫌於別爲義例令人疑故皆繫國也方氏苞謂展與當承國若名不繫國則疑於庶孽爭立非也卽名繫國何知非庶孽爭立者也

叔弓帥師疆鄆田

疆者疆之也溝封之也春取之秋疆之因莒亂而以爲利

葬邾悼公

冬十有一月己酉楚子麇卒

傳曰弑也經曰卒也吾以經斷之曰此卒也非弑也○或曰傳載公子圍入問王疾縊而弑之疑蹤跡曖昧誠有如傳所載者且麇封被執亦聲其罪於軍中則傳固可信非也此皆

傳聞之辭傳者疑而書之耳春秋不以疑加人

楚公子比出奔晉

二年春晉侯使韓起來聘

夏叔弓如晉

秋鄭殺其大夫公孫黑

冬公如晉至河乃復季孫宿如晉

傳曰公如晉弔少姜也至河乃復晉人辭也宿如晉致襚也
○穀梁傳謂公如晉而不得入季孫宿如晉而得入惡季孫
也傳意蓋以季孫訴公於晉使不得人而已入也恐非

三年春王正月丁未滕子原卒

夏叔弓如滕五月葬滕成公

卿共葬非禮也葬襄公滕子來會故厚報之○檀弓記曰滕

成公之喪使子叔敬叔弔進書敬叔卽叔弓也然則叔弓蓋兼弔與葬二事

秋小邾子來朝

八月大雩

冬大雨雹

北燕伯款出奔齊

傳曰燕簡公多嬖欲去諸大夫而立其寵人大夫比以殺其寵而奔其君何以名別也蓋國有二君故

四年春王正月大雨雹

春雨暵非時也又洊災

夏楚子蔡侯陳侯鄭伯許男徐子滕子頓子胡子沈子小邾子宋世子佐淮夷會于申

楚專會諸侯於是始自是晉益偷楚益肆淮夷不殊會者彼來而會非此往而會也與吳會戚同

見襄五年

楚人執徐子

傳曰徐子吳出也以爲貳執之不言以歸者尋釋之

秋七月楚子蔡侯陳侯許男頓子胡子沈子淮夷伐吳執齊慶封殺之

慶封何以在吳自魯奔吳也繫之齊著實也不言齊則疑有二慶封也殺未有言執者此言執亦著實也不言執則疑因伐而戰殺也或曰不言執者服罪也言執者不服罪也非也言執不言執不關於服罪不服罪也楚執封以徇於軍封爲楚言而反之軍中皆粲然笑執徐子稱楚人執慶封不稱楚人何也互見也

遂滅賴

傳曰賴子面縛銜璧楚子焚櫬非也啖氏助曰經但言滅是死位也或他年賴降而舍之故誤耳

九月取鄆

此取邑非取國也莒人滅鄆矣然則何以不繫莒前已書莒人滅鄆矣

冬十有二月乙卯叔孫豹卒

五年春王正月舍中軍

舍中軍豈二軍與四軍也何以四析三爲四季氏二子各一然則何以不曰作四軍其實非四軍也叔弓貳季氏者也何以不曰舍三軍言舍三軍則嫌於無軍也何以謂之舍中軍言舍中軍則知非二軍也何以知非二軍以三卿帥師知

之也自作三軍征於私而於公室無民射人不能具三綱

案三卿帥師見十年

伐莒袁二年伐邾

楚殺其大夫屈申

公如晉

夏莒牟夷以牟婁及防茲來奔

傳曰及防茲以大及小也

秋七月公至自晉

戊辰叔弓帥師敗莒師于蟬泉

秦伯卒

不名史闕也

冬楚子蔡侯陳侯許男頓子沈子徐人越人伐吳

楚伐吳怙彊也越稱人便文耳不可曰徐人越也胡氏謂越

進稱人非也越爲楚役何足進之。越見經始此蓋楚通越以敝吳也然越亦由此浸浸弱

六年春王正月杞伯益姑卒

葬秦景公

夏季孫宿如晉

葬杞文公

宋華合比出奔衛

世子痤以寺人伊戾殺華合比以寺人柳奔

秋九月大雩

楚薳罷帥師伐吳

冬叔弓如楚

齊侯伐北燕

七年春王正月暨齊平

暨亦及也平者誰或曰燕及齊平也或曰魯及齊平也燕則

何以不稱燕蒙前文也間無異事故不稱燕

釋例云六年冬齊侯伐北燕七年

年春而平冬春相接其間無異事省文故不重言燕猶桓五年冬州公如曹六年春因曰實來也傳以其不分明故起見

齊燕平之月

魯則何以不稱我內及外平皆不稱我也魯與

以正之也齊無怨何知暨齊平者必魯也以下書叔孫婁如齊蒞盟知之也然則宜何從從魯暨齊平者定十一年冬及鄭平下書叔還如鄭蒞盟吾以此二經斷之知魯暨齊平也平者和而不盟故蒞盟繼之

三月公如楚

叔孫婁如齊蒞盟

夏四月甲辰朔日有食之

秋八月戊辰衛侯惡卒

九月公至自楚

冬十有一月癸未季孫宿卒

十有二月癸亥葬衛襄公

八年春陳侯之弟招殺陳世子偃師

公子招也稱弟者著賊恩也傳曰兩下相殺不志乎春秋此志者世子君之貳也非也兩下相殺是臣下亂國何得不志王札子殺召伯毛伯非君之貳也何故志之

夏四月辛丑陳侯溺卒

叔弓如晉

楚人執陳行人干徵師殺之陳公子畱出奔鄭

秋蒐于紅

簡車徒曰蒐秋蒐不時也于紅非地也不稱公非公也自根牟至商衡革車千乘魯君舉不得有之

陳人殺其大夫公子過

大雩

冬十月壬午楚師滅陳執陳公子招放之于越殺陳孔奐

招復稱公子常辭也放招殺奐刑頗也殺夏徵舒先殺後入此先滅何也著事之次也徵舒不在國都故先殺後入招奐在國都故先滅而後放殺也

葬陳哀公

滅國不葬此何以葬魯往會也傳曰與嬖袁克葬之或曰楚葬之如齊侯葬紀伯姬也不書楚子葬者互見也上書楚師滅陳下書叔弓會楚子于陳

九年春叔弓會楚子于陳

許遷于夷

夏四月陳災

陳滅矣非有告災者何以書叔弓會楚子于陳記見也抑或叔弓已會而去記聞也不書日失其日也方氏苞曰傳云存陳非也災作於陳地不書陳災當稱楚災乎

秋仲孫貜如齊

傳曰殷聘也周制諸侯三年而一聘謂之殷聘殷者中也七年叔孫婁如齊蒞盟蓋以聘往至是間一年故曰殷聘杜預訓殷爲盛非也

冬築郎囿

十年春王正月

夏齊樂施來奔

秋七月季孫意如叔弓仲孫纘帥師伐莒

三卿並將也叔弓者意如貳也弓叔肸之後與叔孫異魯蓋四卿稱三家胡氏以叔弓爲叔孫誤。方氏苞謂成襄以後每出大師則並舉諸卿散辭也不屬於君而無所統也此說是也又謂孟叔共一軍據左傳清之戰季孫爲左師孟叔爲右師之文恐非也清之戰則然耳未必每戰皆然

戊子晉侯彪卒

九月叔孫婼如晉葬晉平公

十有二月甲子宋公成卒

無冬者闕文也

十有一年春王二月初弓如宋葬宋平公

夏四月丁巳楚子虔誘蔡侯般殺之于申

虔名何也蓋衍文也如衛侯殺滅邢名矣或曰舊史惡之非也惡其誘乎楚子誘戎蠻子何以不名惡其殺乎邾人執郈子用之何以不名

楚公子棄疾帥師圍蔡

五月甲申夫人歸氏薨

歸氏者襄夫人也傳曰娣非也嫡有不書娶無不書薨與葬者歷襄昭定哀更不見襄夫人薨葬以是知齊歸爲嫡也

歸氏爲嫡
何休得之

大蒐于比蒲

胡氏曰大蒐越禮也傳曰君有大喪國不廢蒐不忌君也

仲孫貜會邾子盟于祿禚

秋季孫意如會晉韓起齊國弱宋華亥衛北宮佗鄭罕虎曹人杞人于厥慙

傳曰謀救蔡也蔡卒以滅楚滅陳不問滅蔡不校君子以是惡弭兵

九月己亥葬我小君齊歸

冬十有一月丁酉楚師滅蔡執蔡世子有以歸用之

用之者以祭也既葬稱子此其稱世子何也般死八月矣雖踰葬期喪不獲歸猶未葬也君死國國未暇以禮卽位故從未成君稱世子

十有二年春齊高偃帥師納北燕伯于陽

燕伯何以不名傳曰不以高偃挈燕伯也執大夫不目君大夫賤也大夫納君不名君君尊也不以君之名而予乎大夫

也晉趙鞅納衛世子蒯聵則名以爲非君故也或曰燕伯不
名正也非也正不正不繫乎名不名

案燕伯不名
獨穀梁得之

三月壬申鄭伯嘉卒

夏宋公使華定來聘

公如晉至河乃復

傳曰晉以莒愬辭公也穀梁曰季孫不使遂乎晉也恐非

五月葬鄭簡公

楚殺其大夫成熊

秋七月

冬十月公子愁出奔齊

杜氏預曰書名謀亂故非也愁謀去季氏彊公室何謂謀亂

大夫書名恒辭耳

楚子伐徐

晉伐鮮虞

鮮虞者姬姓國傳曰晉荀吳僞會齊師假道鮮虞遂入昔陽復伐之不稱人或曰貶也非也伐國多矣何以獨於此焉貶齊氏履謙曰秦伐晉鄭伐許晉伐鮮虞三者皆春秋闕文亦非也此直畧辭耳非闕文也荆敗蔡師于荜荊伐鄭徐伐莒何不云是闕文乎猶之殺大夫或稱國或稱人特文有詳畧非義例所在也方氏苞謂赴告不及傳聞畧不知其將者又不知其師之衆寡則第書晉有是事而已亦非也伐國耳赴告不及何必以傳聞書

十有三年春叔弓帥師圍費

叔弓者意如貳也故代之圍費不書弑者家臣賤凡內叛不

書書圖則叛可知方氏苞謂叛三家非叛公故削而不書非也國固公之國也叛三家卽爲叛公若謂削其叛何不并削其圖乎。家氏鉉翁謂家臣尊公室可乎曰可非也家臣真尊公室固可若陽虎侯犯等乃假以爲名謀亂耳惡乎可

夏四月楚公子比自晉歸于楚弑其君虔于乾谿

傳曰公子棄疾脅比而立之令於乾谿之衆而去之靈王經而死非也審如是弑君者當坐棄疾耳何故坐比乎或曰比自外入焉能弑君經言自晉歸明不與謀也繼書棄疾殺比則弑君棄疾之本謀比被脅而蒙惡名耳非也弑逆大惡非可遷就而爲辭比實弑也則坐弑棄疾實不弑也則不坐弑安得變亂名實如傳所云乎若曰比宜效死不立故坐之然則齊陽生何以不坐

據哀六年
坐陳乞

楚公子棄疾殺公子比

其不以國殺之辭書如衛州吁齊無知何也棄疾者與比爭立爲是殺之故以兩下相殺爲文

秋公會劉子晉侯齊侯宋公衛侯鄭伯曹伯莒子邾子滕子薛伯杞伯小邾子于平丘

八月甲戌同盟于平丘公不與盟

晉合諸侯終于平丘傳曰是會也治兵邾南有甲車四千乘而不務德諸侯皆貳於是晉齊侯而盟之晉魯侯而不盟之書曰同盟見劉子與盟也書公不與盟見公同會不同盟也會盟同地而再書者別於異地也會盟同地葵丘是也異地

重丘是也

見傳九年襄二十五年

晉人執季孫意如以歸

以邾莒怨故

蔡侯廬歸于蔡陳侯吳歸于陳

棄疾始起由陳蔡故既立而復之是楚有奉矣不言歸白楚者國固其國也不與楚滅不與楚復也此亡公子耳稱某侯某者爵固其爵也楚不得尊亦不得封也何以稱名本當有國比失國之君也歸者易辭又順辭焉何以不言復歸本非失國自不得言復也

據鄭世子忽衛侯鄭衛侯行

冬十月葬蔡靈公

公如晉至河乃復

吳滅州來

十有四年春意如至自晉

三月曹伯滕卒

夏四月

秋葬曹武公

八月莒子去疾卒

冬莒殺其公子意恢

稱公子者非大夫也傳曰曹莒無大夫非也經言曹殺其大夫無大夫何言大夫也莒慶莒挈非大夫與然則陳人殺其公子御寇亦可謂陳無大夫乎凡殺大夫則稱大夫非大夫則稱公子著其實也傳曰郊公善音恢其大臣殺之立庚與出郊公

十有五年春王正月吳子夷末卒

二月癸酉有事于武宮箭人叔弓卒去樂卒事

武宮者成所立也有事者時祭也傳曰禘非也篇文舞也其

入廟先文後武今言簫入樂始作也叔弓卒以蒞事卒也大
夫卒當祭不告禮也以蒞事卒禮之變也去樂卒事變之禮
也去樂則不止去簫矣卒事終事也

去簫據
宣八年

夏蔡朝吳出奔鄭

傳曰楚信譏也朝吳者蔡舊臣介楚平以復蔡還處其國無
極者譏人也害其寵而奔之

六月丁巳朔日有食之

秋晉荀吳帥師伐鮮虞

冬公如晉

十有六年春齊侯伐徐

楚子誘戎蠻子殺之

此亦誘殺也楚子不名則知名者衍文也蠻子不名不知其

名也傳曰楚聞蠻氏亂誘而殺之復立其子

夏公至自晉

秋八月己亥晉侯夷卒

九月大雩

季孫意如如晉

冬十月葬晉昭公

十有七年春小邾子來朝

夏六月甲戌朔日有食之

秋邾子來朝

八月晉荀吳帥師滅陸渾之戎

陸渾渚王畿非地也然則滅之是乎非也戎非侵敗王畧徙以貳楚爰及干戈震驚郊甸厥罪大矣然則秦晉遷戎亦有

罪矣不書不告也

案秦晉遷陸渾戎於伊川見僖二十二年傳

冬有星孛于大辰

孛以月舉以時舉者非一月也孛于大辰在大辰也大辰心星大火也大辰三心也伐也北辰也謂之三辰

楚人及吳戰于長岸

春秋不以楚及晉外之也何爲以楚及吳皆外也有大小焉傳曰此楚陽句吳光也或稱人或稱國畧之也春秋於外恒畧之不言敗者勝負敵

十有八年春王三月曹伯須卒

夏五月壬午宋衛陳鄭災

同日災也皆來告故書

六月邾人入郕

秋葬曹平公

冬許遷于白羽

十有九年春宋公伐邾

爲邾故也傳曰邾夫人宋向戌女邾人藉稻邾襲之盡俘以歸

夏五月戊辰許世子止弑其君買

己卯地震

秋齊高發帥師伐莒

冬葬許悼公

謂止不嘗藥者過與故與君親無過過而加之弑當刑也故而赦之罪非法也弑逆大惡也既貴止又赦止是春秋成而亂賊不懼也楚商臣蔡般許止一體書弑止獨以不嘗藥蒙

教則書法無以別若曰弑君不葬此葬也蔡景公亦葬又可
曰君子之教般乎○李氏光地謂楚商臣蔡般皆立乎其位
止則不然又謂楚每假討賊屬諸侯許近楚而不討疑三傳
所傳未可盡廢非也凡傳所載多傳聞之辭傳有可疑者信
於經趙盾許止經實書弑傳必明其不弑猶謂傳不可廢是
疑經也歐陽子之論當矣

二十年春王正月

夏曹公孫會自鄭出奔宋

公孫會者曹公子臧子也鄭蓋其采邑奔未有言自者此言
自鄭別於從國都出耳何以奔不知也傳曰叛非也叛則何
以不書叛曰爲賢者之後諱非也曹子臧之賢不見於經矣
何得爲其後諱乎春秋亦不爲賢者諱

秋盜殺衛侯之兄縶

傳曰齊豹殺之非也豹司寇又有主名何故稱盜傳曰盜賊也非也賤者殺人亦宜名之衛侯之兄無位之稱也傳曰目衛侯衛侯累也非也盜陰賊也何足累之若非累衛侯當不稱衛侯之兄乎兄則何以無位縶之足不良故不立

冬十月宋華亥向寧華定出奔陳

十有一月辛卯蔡侯廬卒

案廬當作廬

二十有一年春王三月葬蔡平公

夏晉侯使士鞅來聘

宋華亥向寧華定自陳入于宋南里以叛

杜氏預曰自外至故曰入披其邑故曰叛南里者宋城內里名也然則何以繫之宋據國辭也○胡氏曰凡書叛若戚若

蕭若朝歌不繫國者皆其私邑非也書某人已繫國矣故邑不繫國省文耳非謂私邑可不繫國也

秋七月壬午朔日有食之

八月乙亥叔輒卒

冬蔡侯朱出奔楚

朱穀梁經作東蓋誤也傳曰東者東國也惡之而貶非也東國貶而東不辭也或曰朱出奔楚無歸卒葬之文東國卒於楚無出奔之事疑爲一人非也朱不書卒葬失國也東國不書出奔不告也

案東國卒在二十三年

○李頴曰東國卒于楚與許男

甯卒于楚

在襄二十六年

未見其必爲出奔

公如晉至河乃復

二十有二年春齊侯伐莒

宋華亥向寧華定自宋南里出奔楚

書奔者著逸賊也奔楚者著納叛也自南里者別於自外出
大蒐于昌閒

昭公之世三書蒐皆以非時非地書也不稱公非公也蓋不
得與耳○方氏苞曰狩于即目公公之私行也若蒐則國政
無取乎書公非也若公實與者何得不書公也周官司馬蒐
田之法王執路鼓諸侯執賁鼓皆親蒞行閒而謂書公蒐于
某即爲公之私行非其理也

夏四月乙丑天王崩

六月叔鞅如京師葬景王

王室亂

三月而葬渴葬也何以渴葬亂故也何以不曰京師亂曰京

師亂則極乎上下之辭也曰王室亂則起於父子兄弟之閒耳然則類帶常亂矣不書此書者非常也猛一王也朝一王也真贗莫分未知誰是故謂之亂魯叔鞅送葬而歸曰王室亂魯史承而書之亦曰王室亂○方氏苞曰凡禍變皆直書其事此虛言王室亂何也不言王室亂則劉單以王出不知其事之端而疑於大惡矣

劉子單子以王猛居于皇

以者言有奉也以有正有不正各隨其事胡氏例以爲貶非也猛者太子壽之母弟何以稱名在喪也何以稱王當君也不稱天王未踰年也不稱王子嫌於非正也居者居其所也所居皆王土○戴氏震曰王猛與鄭忽皆以國氏者

秋劉子單子以王猛入于王城

王城天子都有子朝之黨在曰入者難辭也王猛稱名劉單不名何也嫌也王猛不名則嫌於子朝也劉單稱名則嫌於敵猛也臣名君不名常也君名臣不名變也

冬十月王子猛卒

生曰王猛卒曰王子猛何也生而王宜爲嗣卒而子未踰年也未踰年故不崩不葬者亂不得成禮○公穀皆以猛爲篡非也猛稱王朝稱王子嫡孽可知

十有二月癸酉朔日有食之

二十有三年春王正月叔孫婁如晉

癸丑叔鞅卒

晉人執我行人叔孫婁

傳曰取邾師邾人愬於晉

晉人圍郊

郊者周邑也討于朝故圍之不繫周內辭也繫周卽外周矣
晉稱人微者也天子蒙塵不奔問官守又使微者往著勤王
不力

夏六月蔡侯東國卒于楚

秋七月莒子庚與來奔

戊辰吳敗頓胡沈蔡陳許之師于雞父胡子髡沈子逞滅獲陳
夏齊

傳曰吳伐州來楚令尹帥六國救之不言戰畧辭耳傳曰未
陳也非也敗無楚傳曰楚師燭未接也蔡陳序下大夫將也
或言滅或言獲君臣異辭

天王居于狄泉尹氏立王子朝

稱天王謂正也。句者猛之母弟，猛言以當喪未君也。此不言以踰年成君也。君非臣之得以也。猛句皆不言立朝，則言立者不宜立也。劉單稱子爵舉之也。尹氏稱氏族舉之也。援立出尹宗之力也。衛人立晉衆辭也。尹氏立朝專辭也。朝獨尹氏所欲立也。晉不稱公子朝，稱王子何也。不稱王子則嫌於尹氏之朝也。於是敬王居狄泉，號爲東王子朝，居王城，號爲西王，不言者黜之。

八月乙未地震

冬公如晉至河有疾乃復

公如晉不至而復者數矣。未有言其故者。此言有疾何也。別於無疾而復者也。傳曰：公如晉爲叔孫故。或曰：有疾託也。辭不如晉也。非也。此實有疾耳。卽託疾者前乎此，何以不託也。

經言有疾何由知其非疾也

二十有四年春王二月丙戌仲孫獲卒

媼至自晉

大夫執則致致則名不氏者前已見也經或有氏者衍文耳或曰賢也非也○公羊疏曰意如有罪故去氏叔孫無罪故無貶此不知經有叔孫乃是衍文妄爲說耳

夏五月乙未朔日有食之

秋八月大雩

丁酉杞伯郁釐卒

冬吳滅巢

方氏苞曰吳滅巢以復君父之讐與他滅國異

葬杞平公

二十有五年春叔孫婁如宋

夏叔詣會晉趙鞅宋樂大心衛北宮喜鄭游吉曹人邾人滕人薛人小邾人于黃父

傳曰謀王室也王室亂且四年晉人圍郊亦三年矣今始謀之也傳曰趙鞅令諸侯之大夫輸王粟具戍人曰明年將納王逮明年王入成周亦不言納

有鸛鵒來巢

鸛鵒穴居今來巢木不踰濟今來魯故曰有記異也○漢書五行志顏師古注曰此鳥本亦巢居不皆穴處也書巢者著其居止字乳不卽去也

案劉向以爲有蜚有蜚不言來者氣所生所謂蜚也鸛鵒言來者氣所致

所謂祥也

秋七月上辛大雩季辛又雩

雩又雩禋祀也上季者暑辭也何以不曰本見旱甚一月再雩無取於日故空言辛雩蓋宜辛與抑魯特用之與季辛不言大蒙上文也大者僭也

九月己亥公孫于齊次于陽州

公何以孫討季氏也公無民季無君傳曰公徒皆釋甲執冰而臨也陽州齊魯境上邑未能入齊故次於境

齊侯唁公于野井

弔生曰唁野井齊地齊侯將唁公公前逆之爲恭也傳曰以過禮相見孔子曰其禮與其辭足觀矣蓋議之也

冬十月戊辰叔孫穀卒

十有一月己亥宋公佐卒于曲棘

傳曰邾公也宋公者意如外舅也舍壻助君知義矣卒於行

知命矣

十有二月齊侯取鄆

方氏苞曰外取邑皆稱人獨此得齊侯是知書人者以爲亂世相攘奪之事非也君則稱將將卑稱人師衆稱師著其實而已取鄆爲公也不伐魯討意如乃取鄆以居公胡氏謂見公於魯已絕逐於季氏爲不君謬也君父非臣子所當絕二十有六年春王正月葬宋元公

三月公至自齊居于鄆

公孫矣不告廟猶致者存公也鄆非國都而言至者內公也杜氏預曰入魯境故書至猶在外故書地傳曰公次于陽州其曰至自齊何也以齊侯之見公可以言至自齊也○或曰禮曾子問君去國大宰取羣廟主以從是則公每出必致亦

當告廟矣

夏公圍成

成者孟氏邑也季用以拒公內書叛曰圍圍獨公明齊不與也

秋公會齊侯莒子邾子祀伯盟于郭陵

傳曰謀納公也以賂故不果納

公至自會居于鄆

九月庚申楚子居卒

冬十月天王入于成周

王始得京師也何以不言入京師言入京師則不知爲成周也成周者洛陽王之下都王城者邾鄆謂之東都於是子朝餘黨據三城敬王避之徙都成周在王城東故傳曰東周○

胡氏謂不稱京師著其衰弱同於列國非也

尹氏召伯毛伯以王子朝奔楚

以者言有奉也以猛正也以朝非正也尹氏其首召毛其從也不言出外之也王入成周王所居則內之子朝雖居王城非王所居則外之○一尹氏也出會諸侯則爵舉立朝奔楚則族舉何也尹氏世爲卿士其宗盛彊立子朝者舉族戴之也出奔楚者舉族奔之也

二十有七年春公如齊公至自齊居于鄆

夏四月吳弑其君僚

傳曰光弑也非也經繫以國僚疑坐國亂見弑傳聞者疑爲光耳春秋不以疑加人

楚殺其大夫卻宛

秋晉士鞅宋樂祁犁衛北宮喜曹人邾人滕人會于扈

傳曰令戌周且謀納公也後五年始城成周謀納公而復受賂不果納

冬十月曹伯午卒

邾快來奔

公如齊公至自齊居于郕

二十有八年春王三月葬曹悼公

公如晉次于乾侯

次陽州阻於齊次乾侯拒於晉

夏四月丙戌鄭伯寧卒

六月葬鄭定公

秋七月癸巳滕子寧卒

冬葬滕悼公

二十九年春公至自乾侯居于鄆齊侯使高張來唁公

鄉曰至自齊齊侯親唁得至齊也今不曰至自晉晉不見容未至晉也苟躒唁公則地乾侯外也高張唁公則不地鄆內也內鄆所以內公也

公如晉次于乾侯

夏四月庚子叔詣卒

秋七月

冬十月鄆潰

鄆何以潰自潰也公無德於民民亦無恩於君○方氏苞曰不書季氏伐鄆而書鄆潰猶不書鄭敗王師而書蔡人衛人陳人從王伐鄭也公穀胡傳皆謂昭公無德於鄆蓋以鄆爲

自潰其實非也

三十年春王正月公在乾侯

正月存公也何以獨於此焉存居鄆猶魯也無事乎存乾侯非魯矣不可不存鄉曰居今日在何也內外辭也臣子於君父在外猶在內也

夏六月庚辰晉侯去疾卒

秋八月葬晉頃公

冬十有二月吳滅徐徐子章禹奔楚

徐子名者蓋吳起以名也或曰先服後奔絕之非也滅國而名告終也其不名者史闕耳徐介居江淮間北通上國南之吳楚孔道也吳光欲圖楚故滅之伍員曰請爲三師以肄焉一師至彼必皆出彼出則歸彼歸則出楚必道敝闔廬從之

楚於是治病

三十有一年春王正月公在乾侯

季孫意如會晉荀躒于適厯

季氏賊乎魯陳氏賊乎齊六卿賊乎晉齊晉以國分魯侯以客死襄昭之春秋以貨成貨之行由大夫而已矣公在乾侯季孫意如會晉荀躒于適厯君子傷之

夏四月丁巳薛伯穀卒

晉侯使荀躒唁公于乾侯

秋葬薛獻公

冬黑肱以濫來奔

黑肱不繫邾闕文也公羊云通濫穀梁云别乎邾茲非

十有二月辛亥朔日有食之

三十有二年春王正月公在乾侯取闕

取鄆取闕皆魯地也若取外邑然杜氏預曰公別居乾侯遣人誘闕而取之不用師徒○方氏苞曰不書公取何也圍成可書公也魯地而書公取則其義舛矣

夏吳伐越

秋七月

冬仲孫何忌會晉韓不信齊高張宋仲幾衛世叔申鄭國參曹人莒人薛人杞人小邾人城成周

王入於成周都焉諸侯之大夫相與城之何以不言城京師言城京師則不知爲成周也記實也旣城之遂爲京師○李頴曰前有天王入于成周則城之可知爲京師不得以爲緣陵例

十有二月己未公薨于乾侯

春秋說畧卷十一

棲霞郝懿行學

海陽趙銘彝校刊

定公

元年春王三月晉人執宋仲幾于京師

定公未立稱元年者史臣追書也元年必書正月謹始也此無正月公未立也又適正月無事故闕之公羊云正月者正卽位穀梁云不言正月定無正非也若實正月有事則亦不容空沒其文又不得曲避正月而移於他月也傳曰城成周宋仲幾不受功爲是執之城則曰成周執人則曰京師何也城成周著其地也執于京師示執人於天子之側也不書所歸旣在京師不待言也

夏六月癸亥公之喪至自乾侯戊辰公卽位

昭公薨七月矣喪始至魯無君踰年矣公始立嗣子定位於初喪今喪至五日始卽位者或曰殯而卽位禮也或曰喪從外至正棺兩楹也繼故不卽位正也公卽位者制於季氏也他公卽位皆不日朔日也得時不書此非朔日也不得時故書

秋七月癸巳葬我君昭公

九月大雩

立煬宮

煬公者伯禽子考公弟魯一生一及昉乎此去定公二十世矣傳曰昭公出季平子禱焉故立其宮或曰意如黜公衍務人而立公子宋宋於昭公爲弟立煬宮爲是也

冬十月隕霜殺菽

二年春王正月

夏五月壬辰雉門及兩觀災

雉門兩觀天子制也雉門者中門也兩觀者象魏象魏謂之闕何以稱及災起雉門延及兩觀傳曰主災者兩觀非也

秋楚人伐吳

冬十月新作雉門及兩觀

凡新作不書非禮則書

三年春王正月公如晉至河乃復

公如晉始朝也何以復不知也○三傳皆無說

二月辛卯邾子穿卒

夏四月

秋葬邾莊公

冬仲孫何忌及邾子盟于披

四年春王二月癸巳陳侯吳卒

三月公會劉子晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏於召陵侵楚傳曰楚爲一裘一馬拘唐蔡二君三年而後遣晉爲蔡故合十八國之諸侯於召陵桓文未有也慢而不伐陋矣荀寅求貨弗得遂辭焉是年冬蔡以吳入郢自是吳盛彊主諸侯夏四月庚辰蔡公孫姓帥師滅沈以沈子嘉歸殺之

五月公及諸侯盟于皋鼬

再稱公者會盟異地嫌公不與也或曰書公及者內爲志非也盟于宋書豹及豈內爲志也盟言諸侯見劉子不與也正也○何氏休曰再言公者昭公數如晉不見荅定公初卽位

得與諸侯盟故喜錄之程子胡氏謂公求爲此盟竝非

杞伯成卒于會

此卒於旣盟之後也不言卒於盟者嫌卒於盟之時也不言卒於師者嫌卒於侵楚之時也

六月葬陳惠公

許遷于容城

秋七月公至自會

劉卷卒

葬杞悼公

楚人圍蔡

晉士鞅衛孔圉帥師伐鮮虞

葬劉文公

劉卷者劉子也何以不具爵王爲之赴也然則葬何以稱公從臣子之辭也王臣無外交故不卒不葬此何以卒來赴也何以葬往會也非禮也或曰當會諸侯特爲之赴非也王臣會諸侯多矣何不皆爲赴或曰因其有定難功特卒之也非也單子同有定難功何以不卒○王子虎劉卷王臣之中特卒二人隱三年公穀經書尹氏卒尤所難曉

冬十有一月庚午蔡侯以吳子及楚人戰于柏舉楚師敗績楚

囊瓦出奔鄭庚辰吳入郢

郢當從公穀經作楚

楚怙彊陵諸侯於蔡爲世讐今者昭侯發憤假手句吳稱以者能左右之也戰稱吳子入郢稱吳何也詳畧辭也或曰稱子進之稱吳貶之非也郢楚都也入國例皆稱國此以都舉疑誤公穀二經竝作楚

五年春王三月辛亥朔日有食之

夏歸粟于蔡

蔡爲楚圍不能救乃輸之粟畏災也公穀云諸侯歸之杜預云魯歸之皆是○方氏苞謂魯人獨歸之粟也歸粟必壤地相接水道可通魯歸蔡粟以淮也若諸國但能歸蔡財安能輸之粟非也魯獨歸粟義無所妨若開水道可通則諸侯輸魯魯輸於蔡有何不可經言齊人來歸衛寶卽代他國歸粟之例豈可謂寶獨歸魯不歸宋陳蔡乎經言戍陳戍虎牢豈可謂魯獨戍乎經言取郕大鼎于宋則齊陳鄭皆有賂可知經不具書耳

於越入吳

於發聲也或稱越或稱於越一爾越入吳吳在楚故○劉氏

敵曰於越者其自稱者也越者中國稱之者也李氏廉曰考之經文入吳敗吳皆越人來告故書於越吳伐越則吳來告也故止書越劉說爲合

六月丙申李孫意如卒

秋七月壬子叔孫不敢卒

冬晉士鞅帥師圍鮮虞

六年春王正月癸亥鄭游速帥師滅許以許男斯歸

二月公侵鄭公至自侵鄭

夏季孫斯仲孫何忌如晉

傳曰獻鄭俘也二卿竝使制於陽虎故

秋晉人執宋行人樂祁犁

傳曰祁犁如晉趙鞅逆而飲之酒獻楊楯六十士鞅曰未致

使而私飲酒大不敬執之行人其官也

冬城中城

方氏苞曰僑如欲去季孟則城中城陽虎欲去三桓亦城中城皆欲得公以濟其亂謀也

季孫斯仲孫忌帥師圍郕

郕貳於齊也仲孫忌不言何闕文也傳云議二名謬矣

七年春王正月

夏四月

秋齊侯鄭伯盟于鹹

齊人執衛行人北宮結以侵衛

齊侯衛侯盟于沙

盟鹹盟沙叛晉故也叛晉者以齊景圖霸故霸業驟諸侯散

自是無殺會。此年結叛晉明年盟曲濮亦結叛晉又明年次于五氏遂伐晉

大雩

齊國夏帥師伐我西鄙

九月大雩

一秋再雩亦爲旱甚

冬十月

八年春王正月公侵齊公至自侵齊

二月公侵齊三月公至自侵齊

魯無公久矣六年侵鄭今年再侵齊皆稱公自宣以來未有也三桓微陪臣彊公益爲役耳。傳言魯無軍政士無鬪志不能乎伐故侵耳

曹伯露卒

齊國夏帥師伐我西鄙

公會晉師于瓦

齊伐魯晉士鞅救焉公會之何以不稱會士鞅軍行重師也不書救蓋齊已去

公至自瓦

何爲不以會致凡離會致地不致會自參以上致會

秋七月戊辰陳侯榑卒

晉士鞅帥師侵鄭遂侵衛

葬曹靖公

九月葬陳懷公

季孫斯仲孫何忌帥師侵衛

冬傳何鄭伯盟于曲濮

從祀先公

從順也先公閔僖也何以不目親盡故畧之桓僖災何以目
見哀義不得畧也今日從祀則知躋爲逆祀也不目祭名不
書地不言日畧之也傳曰陽虎欲去三桓順祀先公而祈焉
。胡氏據馮山謂昭公之主久未祔祭至是始得從祀於大
廟蓋以從訓祔也然則不目先公何也昭公所祔爲成公義
不繫於所祔故不目也春秋文不虛設猶之祭祀失禮義不
繫於祭名則但書有事不出祭名也或又謂魯祀之不順多
矣今但稱先公則盡從典禮不止爲一公設也亦通

盜竊寶玉大弓

傳曰盜者陽虎也非也虎旣兵敗何暇入宮蓋陰使人竊之

不知主名故書曰盜也傳曰虎欲殺季孫於蒲圃不克而出
寶王者夏璜也大弓者繁弱也何以不目義繁弓玉不繫於
名故不目也

九年春王正月

夏四月戊申鄭伯薨卒

得寶玉大弓

得者獲也不言歸不與盜歸也弓玉則得矣盜則未得也是
國無政也何以書國寶也竊之書得之書

六月葬鄭獻公

秋齊侯衛侯次于五氏

秦伯卒

冬葬秦哀公

十年春王二月及齊平

夏公會齊侯于夾谷公至自夾谷

晉趙鞅帥師圍衛

齊人來歸鄆讎陰田

取自內也歸自外也歸濟西田歸讎及闡皆不言來此言來蓋自來也其自來何也孔子行乎季孫三月不違及齊平會夾谷釋怨睦鄰齊人慕義而歸魯田鄆讎陰者汶陽田也不言及者大小敵○左穀所記卻來兵誅優施等蓋欲夸大聖人而反小之者歸田亦非由要齊而得傳皆非也

叔孫州仇仲孫何忌帥師圍郕

秋叔孫州仇仲孫何忌帥師圍郕

朱樂大心出奔曹

宋公子地出奔陳

冬齊侯衛侯鄭游速會于安甫

叔孫州仇如齊

宋公之弟辰暨仲佗石彊出奔陳

十有一年春宋公之弟辰及仲佗石彊公子地自陳入于蕭以叛

傳曰宋公有嬖曰向魋又信讒於是大夫公子母弟奔者三從者二樂大心以讒逐公子地以嬖臣辰爲地請不許亦以嬖臣也宋公不君辰不弟地大心佗彊不臣奔稱暨叛稱及何也暨及一也暨之與及猶不之與弗克之與能辭有輕重義實通也傳曰昭七年暨齊平傳暨者不得已也以外及內曰暨非也此辰佗彊皆一國之人耳何有外內乎

夏四月

秋宋樂大心自曹入于蕭

此不言叛何也蒙前文也四子在蕭大心從之叛可知

冬及鄭平叔還如鄭泣盟

十有二年春薛伯定卒

夏葬薛襄公

叔孫州仇帥師墮郕

衛公孟彊帥師伐曹

季孫斯仲孫何忌帥師墮費

秋大雩

冬十月癸亥公會齊侯盟于黃

十有一月丙寅朔日有食之

公至自黃

十有二月公圍成

費郈成者三家邑也疆耦國南蒯公山叛乎費侯犯叛乎郈公斂陽者孟氏之孚也守乎成獨不叛故費郈之疆二氏亦憚矣孟氏則曰成吾保障也孔子行乎季孫三月不違曰邑無百雉城百雉非制也於是墮之墮者毀城也叔孫墮乎郈季孫墮乎費獨孟氏不肯墮成公圍之不克未幾孔子行或曰墮三都非孔子事也墮而不克聖人豈爲之

公至自圍成

圍成國內事亦致者成疆比之若敵國然

十有三年春齊侯衛侯次于垂葭

夏築蛇淵囿

大略二七補

衛公孟彊帥師伐曹

秋晉趙鞅入于晉陽以叛

冬晉荀寅士吉射入于朝歌以叛

晉趙鞅歸于晉

傳曰邯鄲午無罪鞅殺之不忘君矣寅吉射亦無君命擅興師是以亂易亂也入逆辭也鞅入晉陽寅吉射入朝歌是皆專土背君故書曰叛三子之罪鉞矣鞅何以歸晉國無政也韓魏者黨趙氏逐二子召鞅而歸之其卒以分晉。公穀以地正國之說大謬如其言是黨叛獎亂也

薛弑其君比

三傳竝無說今所未詳

十有四年春衛公叔戌來奔衛趙陽出奔宋

案衛趙陽公穀經作晉趙陽

二月辛巳楚公子結陳公孫佗人帥師滅頓以頓子牂歸

夏衛北宮結來奔

五月於越敗吳于槁李吳子光卒

敗而卒何也卒於敗也闔廬闔越允常死興師伐越句踐襲敗之射殺闔廬闔廬能用兵者也卒以兵死

公會齊侯衛侯于牽公至自會

秋齊侯宋公會于洮

傳曰會牽會洮謀救范中行氏也

天王使石尙來歸賑

石尙名者士也傳曰賑俎實也生日賑熟曰膳或曰宜社肉也盛以器故曰賑魯不助祭猶歸賑非禮也歸賑歸賑皆

私惠也故不言錫

衛世子蒯聵出奔宋

衛靈侯夫人曰南子靈侯不君南子不婦奔公叔戍趙陽北宮結今又奔蒯聵傳曰蒯聵以欲殺母聞或曰非也南子譏也世子而奔之父不父子不子○傳謂蒯聵欲殺母劉敞劉絢深辯其誣謂傳所記者非其實也

衛公孟彊出奔鄭

宋公之弟辰自蕭來奔

仲佗石彊公子地樂大心不書何也奔不同時時不同地皆未可知既不悉告故畧而不書

大蒐于比蒲

邾子來會公

蒐無公會有公何也以會有公知蒐亦有公不書者公不與也蒐而會非禮也不地者於比蒲與蕭叔朝公同

莊二十三年

城莒父及霅

公既與齊衛爲會而懼故城二邑以備晉此年無冬史闕文○何氏休曰是年齊饋女樂孔子去不書冬者貶也謬也饋女樂亦非此年事史記魯世家攝相事歸女樂孔子行皆在十二年

十有五年春王正月邾子來朝

麋鼠食郊牛牛死改卜牛

不言其所舉死重也傳曰食漫也恐非

二月辛丑楚子滅胡以胡子豹歸

夏五月辛亥郊

何為夏五月郊牛災矣改卜牛牛吉矣乃卜郊一卜之則不吉再卜之則不吉三卜之則不吉四卜之夏五月辛亥吉於是郊○李穎曰牛必在滌三月自改卜牛後滿三月而卜郊自應至五月矣似未必四卜之故

壬申公薨于高寢

鄭罕達帥師伐宋

齊侯衛侯次于渠蔭

邾子來奔喪

葬有期故言會喪無容故言奔奔喪臣子之道也

秋七月壬申邾氏卒

傳曰邾氏者何哀公之母也何以不稱夫人哀未君也○傳曰不稱夫人不赴且不祔也方氏苞曰三桓不使用夫人之

禮非正嫡廢也卑哀公也

八月庚辰期日有食之

九月滕子來會葬

丁巳葬我君定公雨不克葬戊午日下昃乃克葬

日中未昃也下昃僅遠乎日也。案王制葬不爲雨止蓋庶人禮耳此及宣八年書雨不克葬似不爲非禮穀梁及胡氏譏之非也

辛巳葬定嬖

不言我小君亦哀未君也因著妾爲夫人之非何以知妾爲夫人也葬而舉諡曰定是明以爲夫人也。傳曰不稱小君不成喪也方氏苞曰謂子未踰年母不得稱夫人則不當書卒葬書卒葬是成之爲夫人也成之爲夫人而復殺其禮弱

其君也血子并不嘗焉則其禮益畧矣蓋一任季孫之顛倒耳

冬城漆

春秋說畧卷十一

春秋說畧卷十二

棲霞郝懿行學

海陽趙銘彝校刊

哀公

元年春王正月公卽位

楚子陳侯隨侯許男圍蔡

不能報吳釋憾於蔡也隨世服於楚柏舉之役楚昭由隨以
免德之故與從事焉許已滅此復見者蓋楚復之

麋鼠食郊牛改卜牛

不言牛死蓋未死也不言所食非一處也

夏四月辛巳郊

秋齊侯衛侯伐晉

冬仲孫何心帥師伐邾

二年春王二月季孫斯叔孫州仇仲孫何忌帥師伐邾取鄆東田及沂西田癸巳叔孫州仇仲孫何忌及邾子盟于司繹

鄆沂者界也東西者限也田不目多辭也三人伐二人盟蓋志未厭也又卑邾

夏四月丙子衛侯元卒

滕子來朝

晉趙鞅帥師納衛世子蒯聵于戚

其言于戚未得衛也何以未得衛拒於輒也輒者蒯聵子靈公死而輒立蒯聵人而輒拒此出奔矣復稱世子何也正名也蒯聵無父不當入輒有父不當拒或曰大夫出奔位已絕此稱世子明位未絕非也蒯聵罪狀未明而奔靈公又未有命復之而卒假使位猶未絕其不可立亦明矣死父之謂何

而背之也豈有無父之國哉蒯聵雖無父輒不可以不子生父之謂何而兵之也豈有無父之君哉爲輒者效死不立可也傳曰輒不以父命辭王父命非也輒不有父安有王父秋八月甲戌晉趙鞅帥師及鄭罕達帥師戰于鐵鄭師敗績冬十月葬衛靈公

十有一月蔡遷于州來蔡殺其大夫公子駟

州來者吳所滅也蔡遷焉避楚也公子駟公孫獵蓋不利遷者今年殺駟明年放獵○傳謂蔡侯背楚誑吳殺駟以說如此當先書殺後書遷經乃先遷後殺傳未可信

三年春齊國夏衛石曼姑帥師圍戚

此圍戚也何以先國夏主兵也何以主兵討蒯聵也蒯聵主晉而齊京惡晉晉逐范氏則齊救之晉納蒯聵則齊圍之將

以求霸心或曰曼姑主兵知其不義故推齊爲首非也曼姑主兵而推齊非實也春秋何爲成之乎戚不繫衛自文也不必繫也傳曰先國夏子不圍父也不繫戚於衛子不有父也非也卽先國夏無以見子不圍父卽戚不繫衛無以見子不有父也且春秋書之正乃見其圍父有父耳何反沒之乎然則彭城繫宋虎牢繫鄭與此異何也互見也入彭城亦不繫宋矣城虎牢亦不繫鄭矣或曰離戚於衛非也上書晉趙鞅納衛世子蒯聵于戚是卽繫戚於衛矣猶之書齊高偃納北燕伯于陽是卽繫陽於燕矣何謂離之乎豈必書納衛世子蒯聵于衛戚而後謂之不離乎然則亦必書納北燕伯于北燕陽而後謂之不離乎

夏四月甲午地震

五月辛卯桓宮僖宮災

桓僖親盡而廟不毀於是災不言及者

據定二年雉門及兩觀災

蓋兩宮

同時遇災非所及也傳或曰敵或曰一非也桓於僖爲祖言及無所不可雉門兩觀言新作此不言者蓋不復立傳曰復立亦非也

季孫斯叔孫州仇帥師城啟陽

朱樂髡帥師伐曹

秋七月丙子季孫斯卒

蔡人放其大夫公孫獵于吳

冬十月癸卯秦伯卒

叔孫州仇仲孫何忌帥師圍邾

四年春王二月庚戌盜殺蔡侯申

傳曰公孫翩射而殺之非也翩卽有主名矣何以稱盜乎不言君盜殺不得稱其君不言弑不稱君者不言弑○方氏苞曰凡書盜者必陰賊而未有主名也惟無主名故辰以懼禍而奔姓霍以見疑而殺○懿行案胡氏偏責蔡侯不可以訓又案宣十七年蔡侯申卒纔五世昭侯又名申二者必有一誤

蔡公孫辰出奔吳

葬秦惠公

宋人執小邾子

夏蔡殺其大夫公孫姓公孫霍

晉人執戎蠻子赤歸于楚

戎蠻子名失地也赤逃楚而奔晉晉詐執之不義也又歸于

楚京師楚也不言畀者弱晉也

據僖二十八年晉侯執曹伯畀宋人

城西郭

六月辛丑亳社災

亳社殷社也不稱殷者社主土從地名爾傳曰亡國之社以爲廟屏戒也屋之故災○馮氏荆南日記稱亡國之社屋之恐非先王之意魯有亳社其因國寶殷墟耳又諸君子立於社宮謀亡曹則凡社皆有宮不獨亳社也

秋八月甲寅滕子結卒

冬十有二月葬蔡昭公

葬滕頃公

五年春城毗

夏齊侯伐宋

晉趙鞅帥師伐衛

此年伐衛明年伐鮮虞皆范氏故也

秋九月癸酉齊侯杵臼卒

冬叔還如齊

閏月葬齊景公

閏月何以書傳曰喪不數閏不正其閏也鄭氏曰以月數者數閏以年數者雖有閏不數也○公羊云喪以閏數穀梁云喪不數閏二傳不同康成通其意是也劉氏敞曰葬以月斷宜數閏恐非蘇氏轅曰春秋不書閏書閏皆譏

六年春城邾瑕

邾瑕邾之瑕也魯城之迫邾也明年遂入邾魯自城啟陽城西郭城毗比年三城皆備晉此則謀邾也○不書取邾瑕何

也書城知其取也書取不知其城也

晉趙鞅帥師伐鮮虞

吳伐陳

夏齊國夏及高張來奔

叔還會吳于柤

吳不稱子不稱師不稱人畧辭也叔還會之則非不知其主名矣

秋七月庚寅楚子軫卒

齊陽生入于齊齊陳乞弑其君荼

陽生入而荼弑是陽生與聞乎弑矣陳乞者爲主乎弑者也景公欲君荼乞欲君陽生陽生者庶長也乞不諫景公私陽生而走之景公已葬私陽生於其家脅諸大夫而君之於是

往弑荼陽生繫齊或曰罪景公非也小白繫齊何以不曰罪
僖公不稱公子或曰絕之非也商人親弑何以稱公子然則
陽生立乎其位與楚比同而所坐異何也比實弑也則坐比
乞實弑也則坐乞陽生不弑而實與聞乎弑也則首書齊陽
生入于齊

冬仲孫何忌帥師伐邾

宋向巢帥師伐曹

七年春宋皇瑗帥師侵鄭

晉魏曼多帥師侵衛

夏公會吳于鄫

秋公伐邾八月己酉入邾以邾子益來

公無兵久矣猶能伐人而入其國乎蓋三家之兵也然則何

以稱公三家之兵而使公將之公於是反爲役也事畢兵各歸其家公若臣僕然入邾惡名也三家利其實公受其名

宋人圍曹

冬鄭駟弘帥師救曹

八年春王正月宋公入曹以曹伯陽歸

此滅矣其言入何未滅也當是時伯陽虜司城彊死國舉矣何言未滅蓋未久而復也或曰此實滅矣書入者曹亡春秋之終天下無霸聖人傷之蓋不忍書也非也滅則書滅不滅則不書滅安有沒其實乎經言入傳言滅經乎從傳乎從○六國時有曹交爲曹君之弟知曹實未滅矣

吳伐我

邾故也何以不言四鄙言四鄙者未至國都今至國都故不

言四鄙曰伐我而已蓋城下之師也定哀多微辭

夏齊人取讎及閭

歸邾子益于邾

秋七月

冬十有二月癸亥杞伯過卒

齊人歸讎及闕

其取之也賂也邾故也其歸之也服也亦邾故也邾子者齊出也○左傳爲季姬故齊鮑牧帥師伐我取讎及闕然經不書伐蓋未可信當從公羊

九年春王二月葬杞僖公

宋皇瑗帥師取鄭師于雍丘

以詐盡俘之曰取宋取鄭師鄭取宋師

見十年

佳兵不詳其事

好還

夏楚人伐陳

秋宋公伐鄭

冬十月

十年春王二月邾子益來奔

公會吳伐齊三月戊戌齊侯陽生卒

經曰卒也傳曰弑也吾以經斷之曰此卒也非弑也○齊大國止師小嫌何至遽弑其君以說傳未可信

夏宋人伐鄭

晉趙鞅帥師侵齊

五月公至自伐齊

葬齊悼公

衛公孟彊

子衛

李氏廉曰彊蒯聵之黨今歸於衛必從輒而棄蒯聵故十五年蒯聵入國彊復奔齊

薛伯夷卒

秋葬薛惠公

冬楚公子結帥師伐陳吳救陳

十有一年春齊國書帥師伐我

左傳作戰於郊檀弓作戰於郎竝非也果如其說當言四鄙

不當言伐我經又不書戰也

說見八年吳伐陳

夏陳轅頗出奔鄭

五月公會吳伐齊甲戌齊國書帥師及吳戰于艾陵齊師敗績

獲齊國書

會伐有公知戰有公矣不書者便文耳不可以國書及乎公也抑或公會伐而不與戰也公不與戰故亦不致也此吳伐齊書齊及吳者以內及外也傳曰國書戰死是與華元生獲者異

秋七月辛酉滕子虞母卒

冬十有一月葬滕隱公

衛世叔齊出奔宋

十有二年春用田賦

用者不宜用也田者井也賦者財也古者農任田商賈任里田出粟里出賦因粟以制用因賦以制軍國民給足軍用無乏魯自宣初稅畝田非古矣成作丘甲賦非古矣今用田賦口二吾猶不足於是計田出賦商賈之征竝仰諸農。李氏

廉曰杜云：土賦之法因其田財通出馬一匹牛三頭今欲別其田及家財合爲一賦則是一丘出馬二匹牛六頭也然杜氏於作丘甲已云魯使丘出甸賦是一丘出馬四匹牛十二頭矣安得復云馬一匹牛三頭乎其說前後相戾不可從胡氏獨用國語於義爲長

夏五月甲辰孟子卒

孟子吳女昭公夫人也魯人諱之謂之孟子春秋順時不改以徵過也不書薨不稱夫人不得言薨何以不稱夫人或曰不命於天子非也不稱夫人薨不以夫人禮薨也不書葬不以小君禮葬也傳曰死不赴不反哭孔子與弔適季氏季氏不纓放經而拜然則季氏黜之與

公會吳于橐皋

秋公會衛侯宋皇瑗于鄆

宋向樂帥師伐鄭

冬十有二月螽

不時也螽失政所致非關置閏明年九月十二月螽豈亦失閏也左氏所記非聖人語

十有三年春鄭罕達帥師取宋師于岳

夏許男成卒

公會晉侯及吳子于黃池

吳夫差敗越伐魯破齊師威震天下城邗溝通江淮起師北征闕深溝於商魯北屬沂西屬濟哆然會晉定於黃池言及者會兩霸辭也吳稱爵主會也其先晉周班也吳語云先吳非也導不書盟何云吳先歆也

楚公子申申伯陳

於越入吳

秋公至自會

晉魏曼多帥師侵衛

葬許元公

九月螽

冬十有一月有星孛于東方

于東方者見於旦也旦而衆星沒故不言所在或曰不言宿

名者不加宿也

據文十四年昭十七年

盜殺陳夏區夫

十有二月螽

十有四年春西狩獲麟

西謂國之西其地蓋大野也得其地故不地狩不言公非公也麟者瑞應獸也言獲者麟出非時爲虞人所得孔子蓋傷之春秋何爲始乎隱爲平王也隱之始則平之終然後知周之不復西也何爲終乎獲麟孔子曰鳳鳥不來河圖不出吾其已夫